

UCAPAN PERDANA MENTERI DI UPACARA PENUTUP
KONGRES EKONOMI BUMIPUTERA DI DEWAN BESAR,
UNIVERSITI TEKNOLOGI MALAYSIA, KUALA LUMPUR
PADA 1HB JUN 1980

Assalamu'alaikum Warahmatullahi Wabarakatuh.

Bismillahir-Rahmanir-Rahim.

Yang Berhormat Encik Ghafar Baba, Pengerusi Biro Ekonomi UMNO, YAB Dato' Seri Dr. Mahathir Mohamad, Timbalan Presiden UMNO Malaysia, YB Naib-naib Presiden UMNO, YB Ahli-Ahli Majlis Kerja Tertinggi UMNO, Para Peserta Kongres, Tuan-tuan dan Puan-puan sekalian,

Saya bersyukur kehadiran Allah Subhanahu Wata'ala kerana dengan limpah rahmat dan izin-Nya dapat saya memenuhi permintaan Jawatankuasa Pengelola untuk merasmikan Upacara Penutup Kongres Ekonomi Bumiputera Tahun 1980 pada petang ini. Saya mengucapkan berbilang terima kasih serta setinggi-tinggi penghargaan kepada para peserta dan semua mereka yang turut terlibat dalam menjayakan Kongres ini. Hasil Kongres ini telah dikemukakan kepada saya sebentar tadi oleh Encik Ghafar Baba dalam bentuk resolusi-resolusi yang disusun.

Kongres Ekonomi Bumiputera selama tiga hari yang telah selesai diadakan adalah amat penting. Kita hanya tinggal 10 tahun bagi menjayakan matlamat-matlamat yang telah ditetapkan untuk dicapai menjelang tahun 1990 dalam rangka Dasar Ekonomi Baru. Di samping itu, Kerajaan juga sedang menyediakan Rancangan Malaysia Keempat. Ini menjadikan Kongres ini lebih penting. Hasil daripada Kongres ini akan dapat membantu Kerajaan untuk menyusun strategi-strategi bagi Rancangan Malaysia Keempat serta memperhebatkan lagi langkah-langkah bagi menjamin pencapaian matlamat-matlamat Dasar Ekonomi Baru.

Saya telah sempat mengikuti perbincangan-perbincangan di beberapa bengkel. Sesungguhnya, saya merasa amat bangga di atas minat, kesungguhan dan sikap berterus-terang para peserta di dalam perbincangan.



YAB Dato Hussein Onn diiringi oleh En. Ghaffar Baba dan Dato Seri Dr Mahathir ketika tiba di upacara penutup Kongres Ekonomi Bumiputera di Dewan Besar Universiti Teknologi Malaysia, Kuala Lumpur pada 1hb Jun, 1980.

Daripada pandangan dan pendapat yang telah dilahirkan di dalam Kongres ini, saya dapat memahami perasaan bimbang dan keraguan kaum Bumiputera terhadap keupayaan mereka serta kemampuan Kerajaan dalam mencapai matlamat Dasar Ekonomi Baru. Walaupun kebimbangan ini merupakan satu perasaan, ia perlu diberi perhatian kerana kebimbangan kaum Bumiputera itu mempunyai asas-asas yang menasabah.

Kejayaan kaum Bumiputera selama 10 tahun yang lalu adalah rendah daripada matlamat yang telah ditetapkan sedang kejayaan yang dicapai oleh bukan Bumiputera adalah pesat dan tinggi. Kesulitan dan masalah yang dihadapi oleh kaum Bumiputera dalam memperolehi kejayaan setakat ini menjadikan kaum Bumiputera sangsi di atas pencapaian matlamat sepenuhnya oleh kerana cabaran dan masalah yang lebih besar mungkin dihadapinya dalam masa 10 tahun yang akan datang.

Tuntutan-tuntutan yang tidak berpatutan dari pihak bukan Bumiputera di samping kejayaan besar yang telah dicapainya itu menambahkan lagi keraguan kaum Bumiputera. Memandangkan kepada keadaan inilah, maka kaum Bumiputera merasakan bahawa masa depan mereka adalah terancam dan mencemaskan. Perasaan kebimbangan kaum Bumiputera ini menjadi semakin bertambah disebabkan keraguan mereka terhadap keupayaan dan kemampuan jentera pelaksanaan Kerajaan menjamin pencapaian matlamat Dasar Ekonomi Baru.

Tuan-tuan dan Puan-puan sekalian,

Dasar Ekonomi Baru yang bermula pada tahun 1971 adalah berasaskan kepada keinsafan perlunya diwujudkan negara Malaysia yang makmur, adil dan bersatu-padu dengan teras dan asas-asas yang kukuh. Perhatian khusus adalah ditumpukan kepada masalah kemiskinan dan jurang perbezaan kedudukan ekonomi yang wujud di kalangan berbagai kaum di negara kita. Salah satu matlamat yang penting di dalam penyusunan semula masyarakat ialah untuk mewujudkan satu masyarakat perdagangan dan perindustrian Bumiputera. Matlamat ini adalah jelas dan menjadi tanggungjawab semua pihak untuk menjamin pencapaiannya menjelang tahun 1990.

Matlamat penyertaan Bumiputera dalam bidang perdagangan dan perindustrian seperti juga matlamat-matlamat lain Dasar Ekonomi Baru bukan saja merupakan janji Kerajaan yang tidak dapat tiada

mesti ditunai dan ditepati tetapi ia juga merupakan satu amanah. Di samping peranan Kerajaan dan jentera pelaksanaannya, kaum Bumiputera sendiri mempunyai peranan dan tanggungjawab yang penting. Tanpa peranan mereka secara aktif dan bersungguh-sungguh, matlamat ini mungkin tidak dapat dicapai. Demikian juga dengan peranan kaum bukan Bumiputera. Mereka harus faham dan insaf tentang hakikat matlamat penyertaan Bumiputera dan kebimbangan kaum Bumiputera sebagaimana yang telah saya nyatakan mula-mula tadi. Mereka mestilah memberi kerjasama sepenuhnya dengan jujur dan bersungguh-sungguh bagi menentukan pencapaian matlamat-matlamat yang telah ditetapkan itu bagi kepentingan masa depan rakyat dan negara keseluruhannya.

Tuan-tuan dan Puan-puan sekalian,

Di dalam usaha mewujudkan masyarakat perdagangan dan perindustrian Bumiputera, kaum Bumiputera sendiri hendaklah menggunakan sepenuh-penuhnya segala peluang dan kemudahan yang terbuka dan disediakan oleh Kerajaan melalui jentera pelaksanaannya. Bumiputera yang telah mencebur diri di dalam lapangan ekonomi hendaklah menumpukan sepenuh fikiran, tenaga dan dayausaha serta mengembeling dan menggunakan segala sumber dan kemampuan yang ada pada mereka bagi menjamin kemajuan usaha yang mereka jalankan. Di samping itu, mereka juga hendaklah bantu membantu sesama sendiri supaya mereka dapat sama-sama maju sebagai satu masyarakat atau golongan dan seterusnya dapat pula membimbing dan membantu Bumiputera yang ingin atau baru menceburi diri di dalam dunia perniagaan. Mereka juga hendaklah mengikis sikap semata-mata bergantung kepada Kerajaan; sebaliknya, mereka hendaklah memupuk sikap percaya kepada diri sendiri dan berdikari.

Tuan-tuan dan Puan-puan sekalian,

Satu perkara yang penting perlu juga diberi perhatian dalam proses mewujudkan masyarakat perdagangan dan perindustrian Bumiputera ialah keperluan mengadakan etika perniagaan atau "business ethics". Etika ini hendaklah selaras dengan nilai yang dipandang tinggi oleh masyarakat kita. Sifat tamak-haloba dan mengharapkan kejayaan tanpa berusaha tidak mempunyai tempatnya di dalam dunia perniagaan yang kita maksudkan. Ini hendaklah digantikan dengan sifat-sifat positif. Etika perniagaan yang

sesuai dengan nilai hidup kita boleh mendorong lebih ramai lagi Bumiputera untuk menyertai bidang perniagaan. Proses melahirkan satu masyarakat perdagangan dan perindustrian Bumiputera yang utuh tidak akan mencapai kejayaan yang tulin sekiranya satu etika perniagaan yang dapat memandu mereka sebagaimana yang saya sentuh tadi tidak wujud di kalangan mereka. Saya harap, pertubuhan dan persatuan perniagaan, perusahaan atau perindustrian akan mengambil dayausaha bagi mewujudkan etika ini.

Tuan-tuan dan Puan-puan sekalian,

Di dalam usaha mewujudkan satu masyarakat perniagaan dan perindustrian Bumiputera, peranan golongan bukan Bumiputera juga tidak kurang pentingnya. Kerajaan telah berulang-kali menekankan bahawa Dasar Ekonomi Baru adalah untuk faedah dan kebaikan semua rakyat di negara kita, tidak kira kaum dan asal keturunan mereka. Sebagaimana yang saya akan jelaskan sebentar nanti, kejayaan yang telah dicapai dalam masa 10 tahun ini telah membuktikan bahawa golongan bukan bumiputera telah menikmati faedah yang besar. Pihak bukan Bumiputera hendaklah insaf di atas hakikat ini dan adalah menjadi tanggungjawab pemimpin-pemimpin mereka untuk memberi gambaran yang sebenarnya tentang faedah-faedah yang telah dan akan mereka nikmati.

Golongan bukan Bumiputera harus juga faham dan sedar dengan perasaan kebimbangan kaum Bumiputera terhadap masa depan mereka dalam bidang ekonomi. Saya telah menjelaskan tadi sebab-sebab kebimbangan kaum Bumiputera itu. Tuntutan supaya matlamat penyertaan Bumiputera sebanyak 30 peratus ditambah kepada 51 peratus, sebagaimana yang telah dikemukakan dalam Kongres ini adalah didorongkan di atas perasaan kebimbangan ini. Ia bukanlah didorongkan oleh sikap tamak-haloba.

Tuan-tuan dan Puan-puan sekalian,

Saya ingin mengingatkan golongan yang cuba mengaburi semangat dan faedah Dasar Ekonomi Baru supaya menghentikan perbuatan yang boleh membahayakan prospek masa depan negara kita. Kerajaan tidak sanggup melihat Dasar Ekonomi Baru dijadikan permainan "politik" yang boleh membangkitkan perasaan benci-membenci antara kaum. Perkara ini, jika tidak dikawal, akan hanya menimbulkan huru-hara dan kekacauan. Rakyat hendaklah berwaspada tentang kemungkinan perkara ini sengaja dibangkitkan oleh pihak-pihak yang tidak bertanggungjawab.

Mereka ini mungkin iri hati melihat kejayaan yang telah kita perolehi, keamanan dan kemakmuran yang telah dinikmati oleh rakyat.

Kita mesti lebih mengutamakan masa depan negara serta mementingkan keamanan, kemakmuran dan kebahagiaan rakyat. Dasar Ekonomi Baru memang telah dirangka dan digubal sedemikian rupa bagi mencapai perpaduan negara yang berkekalan. Tiap-tiap rakyat mestilah menanyakan diri sendiri sekiranya huru-hara dan perkara yang tidak diinginkan ini berlaku, siapakah yang akan rugi dan yang akan menanggung akibatnya?

Tuan-tuan dan Puan-puan sekalian,

Di sini biarlah saya menggambarkan sedikit sebanyak pencapaian matlamat Dasar Ekonomi Baru setakat ini. Dalam usaha pembasmian kemiskinan, kemajuan yang telah dicapai secara amnya adalah menggalakkan. Kadar kemiskinan telah berkurangan dari 49.3 peratus pada tahun 1970 kepada 35 peratus pada akhir tahun 1979.

Dalam lapangan pekerjaan, tambahan purata pekerjaan tahunan antara 1970 hingga 1980 ialah 4.2 peratus bagi seluruh Malaysia. Pengangguran di kalangan semua kaum telah juga berkurangan.

Kemajuan penyebaran pekerjaan dari segi penyusunan semula masyarakat adalah memuaskan. Walau bagaimanapun, jumlah bilangan Bumiputera dalam pekerjaan berpendapatan tinggi, masih lagi kecil. Dalam bidang profesional, bilangan Bumiputera masih lagi rendah. Dalam tahun 1979, misalnya kaum Bumiputera hanya merupakan 11 peratus daripada jumlah bilangan akitek, akauntan 7.6 peratus, jurutera 11.6 peratus dan doktor 8.6 peratus.

Dalam pemilikan harta, kaum Bumiputera perseorangan dan agensi amanah hanya memiliki 11 peratus daripada keseluruhan equiti dalam syarikat berhad dalam tahun 1980. Pemilikan bukan Bumiputera dalam bidang ini adalah jauh lebih tinggi.

Tuan-tuan dan Puan-puan sekalian,

Walaupun pencapaian matlamat Dasar Ekonomi Baru telah menunjukkan kesannya, tetapi kejayaan Bumiputera dalam penyertaan kegiatan ekonomi masih belum lagi memuaskan. Kerajaan sedar dengan kebimbangan kaum Bumiputera. Kerajaan

akan menjalankan dengan sedaya-upayanya segala usaha di dalam kemampuannya bagi memastikan pencapaian matlamat yang telah ditentukan itu. Tiap-tiap rakyat, tidak kira kaum, mestilah insaf akan tanggungjawab ini, lebih-lebih lagi jika mereka memikirkan kepentingan masa depan negara.

Tuan-tuan dan Puan-puan sekalian,

Kita tidak dapat menafikan kejayaan yang telah dicapai setakat ini dalam bidang-bidang tertentu. Salah satu aspek kejayaan yang boleh kita banggakan ialah bertambahnya kesedaran dan aspirasi kaum Bumiputera untuk menyertai dalam berbagai kegiatan ekonomi. Ini adalah satu petanda baik. Dalam masa 10 tahun melaksanakan Dasar Ekonomi Baru kita telah memperolehi berbagai pengalaman yang amat berguna. Pengalaman ini akan kita jadikan panduan bagi kita menilai semula strategi pelaksanaan Dasar Ekonomi Baru bagi menjamin kejayaannya.

Kerajaan sentiasa memberi perhatian yang serius terhadap pelaksanaan Dasar Ekonomi Baru. Berhubung dengan penyelarasan pelaburan sebagaimana yang telah dibangkitkan dalam Kongres, Kerajaan telahpun menubuhkan sebuah jawatankuasa yang dipengerusikan oleh Yang Berhormat Menteri Kewangan bagi memusat dan meningkatkan lagi pelaburan Bumiputera.

Kerajaan sedar, bahawa kejayaan penyertaan kaum Bumiputera dalam kegiatan-kegiatan ekonomi, memerlukan tindakan yang lebih berkesan dari pihak Kerajaan. Rancangan Malaysia Keempat akan mengubahsuaikan program-program yang sedia ada serta mewujudkan program-program baru bagi menentukan pencapaian matlamat-matlamat Dasar Ekonomi Baru. Jentera pelaksanaan Kerajaan akan digerakkan dengan lebih giat lagi supaya ia dapat mencapai hasil yang diharapkan.

Dengan cabaran-cabaran yang besar yang kita akan hadapi dalam tahun-tahun lapan puluhan, seluruh jentera Kerajaan akan melipat-gandakan usahanya bagi menjamin pencapaian matlamat Dasar Ekonomi Baru. Tiap-tiap agensi dan jabatan Kerajaan akan menyesuaikan orientasi dan menyusun semula strategi supaya ia dapat menjalankan tanggungjawabnya dengan lebih berkesan lagi.

Prosedur-prosidur yang usang atau tradisi-tradisi lama yang tidak sesuai lagi dengan kehendak dan masa, akan diubahsuaikan lagi bagi menjamin kelicinan dan meningkatkan lagi prestasi jentera

pelaksanaan. Tiap-tiap Ketua Eksekutif atau pun Ketua Jabatan adalah bertanggungjawab secara langsung bagi menghadapi cabaran-cabaran yang besar dan baru ini.

Tuan-tuan dan Puan-puan sekalian,

Kongres Ekonomi yang berlangsung selama tiga hari ini telah membincangkan berbagai isu yang dihadapi oleh kaum Bumiputera. Rumusan dan resolusi yang disarankan adalah dengan tujuan untuk melipatgandakan usaha kearah pencapaian matlamat Dasar Ekonomi Baru, khasnya mengenai peranan masyarakat dan penyertaan Bumiputera di dalam sektor perdagangan dan perindustrian. Rumusan dan resolusi yang dibuat akan membantu Kerajaan di dalam usahanya untuk menjamin kejayaan Dasar Ekonomi Baru. Di atas segala sumbangan buah fikiran, kritik dan pandangan yang membina demi kepentingan negara, saya ucapkan setinggi-tinggi penghargaan kepada Kongres ini.

Dengan tujuan yang satu dan persefahaman yang tulin di antara Kerajaan dan agensi-agensinya, kegigihan usaha dan semangat Bumiputera, serta kerjasama kaum bukan Bumiputera, saya penuh yakin menjelang tahun 1990 matlamat yang ditentukan akan mencapai kejayaan.

Tuan-tuan dan Puan-puan sekalian,

Dengan hasrat ini, saya dengan amat sukacitanya mengisytiharkan Kongres Ekonomi Bumiputera tahun 1980 ini ditutup dengan rasminya. Wabillahi taufiq Wal-hidayah, wassalamu'alaikum-warahmatullahi-wabarakatuh.